


**REPUBLIKA Y' BURUNDI**



**IBIRO VY'UMUKURU W'IGIHUGU**

**IJAMBO RISHIKIRIJWE NA NYENICUBAHIRO  
Petero NKURUNZIZA, UMUKURU W'IGIHUGU  
KU MUSI MUKURU W'UBUMWE BW'ABARUNDI**

**Gitega, ku wa 04 Ruhuhuma 2013**

## **Barundi, Barundikazi, Ncuti z'uburundi**

1. Tubanje gushimira Imana mushoboravyose yaduhaye igihugu ciza c'uburundi, ikaduha kukibamwo turi amoko menshi atandukanye turi mu madini atandukanye ariko twemera Imana imwe, turi mu migambwe myinshi ariko tuyoboka uburongozi twese, tuva mu mihingo itandukanye ariko tuvuga ururimi rumwe, n'ibindi.
2. Turashimiye incungu y'ukwikukira kw'uburundi Ludoviko Rwigasore yadusigaranye iryo ragi akatwereka ko ubumwe bushigikiwe n'ibikorwa bushikana ku majambere.
3. Twibutse ko uyu munsi duhimaza imyaka mirongo ibiri n'ibiri iheze abarundi biyemeje amasezerano y'ubumwe bwabo, hari kuwa 5 Ruhuhuma 1991.
4. Tuwuhimbaje twibuka icivugo c'uyu mwaka ngo **Dushire hamwe twijukire ibikorwa vyo soko ry'iterambere rirama**, icivugo gihuye n'icahariwe uku kwezi kwa kabiri kivuga ngo **Ubumwe ni isoko ry'iterambere n'amahoro birama**.
5. Ico ciyumviro nticaje nk'icaduka ahubwo cavuye ku barundi bari baza bashegeshwe, barambiwe n'amacakubiri bakabona ko ataho bariko barashika mu gihe bacimba bahishanya ivu.
6. Ayo masezerano yabaye kandi mu gihe hari umuzo wa demokarasi mubihugu vyinshi vya Afrika n'Uburundi burimwo.
7. Ariko naho abarundi benshi bipfuza cane demokarasi si bose bari bariteguye kwemera ivyamwa vyayo. Ari naco catumye abarongozi benshi bari bahejeje gutorwa mu 1993 bagandagurwa bakagerekwako n'abanyagihugu isinzi, amaganya n'amarira agakwira igihugu, hakaduka n'intambara.

## **Barundi, Barundikazi , Ncuti z'uburundi**

- 8.Turashimiye Imana kubona twarikubise agashi tukaja hamwe, tukayaga dufashijwe n'incuti z'uburundi maze tugashika ku masezerano y'amahoro y'i Arusha n'ayo guhagarika intambara, biba ikiraro kitugarukana kuri ubwo bumwe twari twataye.

9. Gushigikira no gutsimbataza ubwo bumwe vyagaragariye mu bikorwa n'ingendo bitandukanye.

- **Ubwa mbere:** Twaratsimbataje intwaro ya demokarasi kugirango imyidogo canke akarenganyo bifatiye ku kwiyadukiza kw'ubutegetsi bihere. Turahimbawe no kubona ubu inzego zatowe ziheza ikiringo zatorewe zigasubirizwa biciye mu matora nyene. Ni intambwe y'ubumwe ikomeye.
- **Ubwa kabiri:** Harashinzwe inzego z'umutekano atagukumirana, maze abazigize bakaba nk'icirore umurundi wese yibonamwo. Biraremeha, uravye uko abahora barwana bagiye hamwe atamaraso asesetse. Ni ikimenyetso ko biyumvamwo ubumwe, bari banyotewe gusubiza hamwe koko.
- **Ubwa gatatu:** Twaratsimbataje ubumwe aho twafata ingingo zo kwigisha abana ku buntu mukaba muzi ko kera hari harabaye gukumirana muri ico gisata. Eka no mugushinga ko abavyeyi bibaruka ku buntu n'abana batarena imyaka itanu bakavurwa ku buntu, vyaratsimbataje ubumwe kuko umwe wese avuga ati "ntaco uwundi andyanye".
- **Ubwa kane:** Gutsimbataza ubumwe vyagaragariye kandi ku buryo abahungiye mu gihugu hagati, canke abahungiye hanze bensi basubiye aho bahora, bagasubira gusangira ubuzima n'abo kumbure bari binubanye. Turashimiye abitabiriye bose iyo ngendo dutera akamo abatarashika kuri urwo rugero ngo nabo batere intambwe.
- **Ubwa gatanu:** Ubumwe bw'abarundi bwaratsimbatajwe kandi n'ibikorwa rusangi aho igikuru ari ukubona kumwe igikenewe maze umwe wese agatanga amaboko ari kumwe n'abandi mu budasa no mu busumbasumbane bwabo. Ibi vyarateye iteka igihugu mu gihe twahimbaza yubile y'imyaka 50 yo kwikukira aho twerekanye ko mu bumwe dushobora vyinshi.
- **Ubwa gatandatu:** Ubumwe bw'abarundi bukomera igihe twese duhuriye ku ntumbero imwe y'iterambere tukirinda kwigenza nk'umutwe w'uruyuzi, tuja iyo tutazi umwe avuga ko igikenewe ari iki, uwundi ari iki. Nico gituma kuba twarumvikanye ku migambi ndongozi yerekana uko twipfuza Uburundi mu 2025 ari intambwe ikomeye ku bumwe bw'abarundi.

**Barundi, Barundikazi, Ncuti z'Uburundi,**

10. Ubumwe bw'abarundi bwagiye buragaragarira kandi mu gufashanya hatarabwe amoko, amadini canke ubundi budasa.

11. Ivyo twarabibonye na cane cane iyo inzara iteye mu ntara runaka maze abanyagihugu bo mu zindi ntara bakegeranya imbuto n'ibifungurwa bakabarungikira, abakozi ba Leta nabo hakaba haragera aho umwe wese agira ico atanze ku mushahara wiwe. Ubumwe nyabwo ni ukubugaragariza mu bihe vy'umubabaro.

12. Duhimbaje uyu munsi mukuru mugihe hamaze iminsi haba amasanganya, yaba ugutwarwa canke ukwuma kw'imirima kubera imvura nyinshi canke uruzuba, yaba kwononekara kw'ibiterwa kubera urubura, haba amazu asenyuka canke ibisakazo bikaguruka kubera isegenya n'umuyaga w'ighuhusi, canke inzu n'amasoko bigasha kubera ivyaduka vy'umuriro.

13. No ku musi w'Imana itariki 27 z'ukwezi kwa mbere, twarahuye n'ivyago aho isoko nkuru ya Bujumbura yasha igatokombera n'ibirimwo.

14. Tubanje guhoza abarundi bose kuko ryari itunga ry'igihugu. Turahojeje cane cane abanyagihugu bari bafise utwo badandariza muri irylo soko eka n'abari baharonkeye akazi. Ibibazo bishikira abantu nabo bakagaragaza ubutwari mu guhangana navyo, no mu kubitorera inyishu.

15. Turashimiye cane abitanze bose bagakora kugirango uwo muriro ntubandanye urandagata. Baba abajejwe umutekano, baba abajejwe intwaro, baba abatowe, baba abanyagihugu ubwabo, umwe wese yarakoze ico ashoboye, kandi turabibashimiye vy'ukuri.

16. Turashimiye igihugu c'Urwanda caciye kinyaragasa kikaturungikira indege nayo igafasha mu kuzimya. Ni ingendo y'umubanyi mwiza, umuzimyamuriro koko.

17. Turashimiye bimwe bivuye ku mutima abanyagihugu bo mu gisagara ca Bujumbura n'abari aho, ku mutima wo kwhangana bagize.

Naho bari mu mubabaro ntangere, ntibajanywe n'ishavu n'agahinda ngo bakore ibidakorwa kumwe "impfu n'impfane bijana" nk'uko duhora tuyumva mubihugu bimwe bimwe na burya hari abari basimbiye ku maradiyo bavuga amajambo aca ivutu.

18. Turashimye abamenyeshamakuru bafashije mu gutabaza kandi bakaguma bamenesha uko biriko biragenda, dukebura ariko bamwe bamwe bakoresheje imvugo yo guteranya Leta n'abanyagihugu.

**Barundi, Barundikazi,  
Ncuti z'uburundi'**

19. Leta turongoye iriko irakora ibishoboka kugira igarukire ku basigaye mu kangaratete. Nico gituma twafashe ingingo zihuta zitari nke.

**Ubwa mbere:** Gukora urutonde rw'abahora barangurirayo imirimo kugira bashobore kwinjira kuraba ko hari utwoba twarasigaye. Urwo rutonde rwari ngombwa kuko twanse ko hari abikika mu kiza.

**Ubwa kabiri:** Gutunganya ikibanza coba kirakora nk'isoko mfata kibanza.

**Ubwa gatatu:** Gushinga umurwi ujejwe gutohoza ivyashitse, ugasabwa kubikorana ubwittonzi n'ubukerebutsi kugira ngo ushire ahabona mu mamaguru masha icoba carateye ako kaga. Abanyagihugu bagasabwa kurindira ibizova mu matohoza no kwirinda gutanako imyikomo.

**Ubwa kane:** Gushinga ikigega co gushigikirana muri ibi bihe bigoye. Uburyo buzojako bukazofasha ubwa mbere mu kwubaka ico kibanza gishasha kugirango abandaza bari muri iryu soko bagifise utwo boba baracuruza baronke aho bakorera. Ico kigega kandi kizofasha kugarukira kubasinzikaye cane kubera ico cago ariko twisunze urwo rutonde rutomoye ruzoba rwakozwe. Ikonte ikaba yaramaze kugururwa

20. Nico gituma dusavye uwo wese afise umutima wo gufasha ngo agire ico aterereye; baba indongozi muri Leta, abakozi ba Leta, abajejwe umutekano, abashingamateka n'abakenguzamateka, abakora mu butungane, abarwizatunga n'abafise amashirahamwe yigenga, abakozi b'Imana mu madini atandukanye, imigambwe, amaradiyo, amatereviziyo n'ibimenyeshamakuru, ubuserukizi bw'ibihugu n'amashirahamwe mpuzamakungu bakorera aha iwacu, n'abadasanzwe bahakorera.

21. Ku baserukira ibihugu vyabo n'amashirahamwe mpuzamakungu, hari umurwi w'abashikiranji washinzwe kubasigurira ibikenewe n'ingene boterera.

22. Kubafise ibikoresho nk'amamodoka, amamashini afasha mu kwubaka, barashobora kudutiza muri ico gikorwa.

23. Ku bandi, dusavye ko ikonte yokugururwa no mu ntara zose z'igihugu kugirango uwo wese afise ico aterera abikore. Vyongeye yomenyeshwa cane abanyagihugu. Dusavye abajejwe intwaro kubigiramwo uruhara.

24. Umukuru w'igihugu, ivyegera vyiwe n'abashikiranji tukaba twiyemeje gutanga akarorero mu gutanga umwe wese igice c'umushahara w'ukwezi kumwe. Tukaba rero tuboneyeho akaryo ko guhimiriza abo mu zindi nzego n'abanyagihugu bose kugira ako kigoro.

25. Twihaye rero ikiringo c'amezi abiri kugira turabe ico tuzoba twaterereye, tubone iyubakwa ry'isoko mfatakibanza aho ryoba rigeze. Ni twabona rero igicagutseko kuri urwo rwubako tuzoraba ingene tugarukira ku bantu nabo, ariko ubushikiranji bw'ugushigikirana bukaba buzoba buraraba ico bwofasha abasinzikaye cane nkuko busanzwe bubikora.

### **Barundi, Barundikazi, Ncuti z'uburundi,**

26. Imbere yo kurangiza, twashaka dusabe abarongoye amabanki, ngo nkuko bamwe baza bavyiyumviriyе barabe ingene basubira guha ingurane abari bazisavye bakaba bahuye n'iki cago, mbere barabe ingene bobagabaniriza urugero babasabako inyungu.

27. Turashigikiye kandi ko amabanki akora ico yise "Fonds de garantie" kugira agarukire kubagize ivyago mu kubaha izo ngurane.

28. Turasavye abazoronka uko basubira gukora ngo bibuke kuza gukingiza urudandazwa rwabo mu mashirahamwe abijejwe ariyo ma assurances. Ako kamo tukaba tugateye n'abandi barwizatunga bose.

29. Turasavye kandi ababijejwe kugenzura no kwubahiriza uko amasoko ategerezwa gutunganywa kugira vyorohereze abatabara. Wa murwi nawo ujejwe gutohoza ivy'iryo sanganya, ni ukore vuba na bwango, ushire ukuri ahabona, tumenye uwerwa n'iki canke kiriya, gurtyo have ivyo kwikekana.

30. Dusubiye kubaremesha dusaba abarundi n'ababa aha i Burundi ngo berekane koko umutima wo gufashanya na kare "**incuti itari incuririza uyibonera mu marushwa**". Ni igipimo duhawe rero mu kugaragaza bwa bumwe bwacu.

31. Tukaba turangije dusubira kwifuriza abarundi bose n'ababa mu Burundi umusi mukuru mwiza.

**MURAKOZE, IMANA IBAHEZAGIRE**